



## O le Leona, Le Tamai Mamoe, Le Nofaalii

### Suesuega Iona 6

### Fesoasoani Faaopopo



#### O le Vaaiga Tele

[E fuafua le faaaogaina o le vaega lenei i le filifiliga a le taitai. Na ona toe faamanatu o vaega ua aofia i le suesuega, ae aoga foi e faaataina mai ai tulaga o le a suesueina mulimuli. Ia filifili le taitai pe manaomia ona faaaogaina le vaega lenei mo le vasega e faamausali ai atili le agaiga o le semina. Afai e toatele le vasega e le tele se malamalama i le Tusi Paia, e mafai la ona aoga le vaega lenei mo i latou.

*Afai o le filifiliga lea, ia faaeteete ia le faaaluina ai se taimi tele. A tele naunau le taimi e faaaluina i le vaega lenei, ona le lava lea o le taimi mo le vaega faapitoa o le lesona. O se isi fautuaga, ia faaaogaina na o ni nai vaega e manaomia tele. O le faamamafaina o le “Vaaiga Tele” i le vasega, e amata atu iinei lona faatauaina atili i le suesuega atoa].*

O loo faaunuua Ioane i le motu o Patamo. Ua foliga pogisa mea uma mo lenei tagata o Le Atua. O mea uma na faanaunau iai, e foliga mai nei o le a le taulau. Ua mavae tausaga e tele e le'i afio mai lava Iesu.

O ia o le faifeau, a ua valavala ma lana ekalesia. Ua leai se taitai e mafai ona talosaga atu iai. Ua matua faatumulia ekalesia uma i le faagutugutulua, aoaoga sese, perofeta pepelo, faalelalolagi, ma ua leai ma se fia gaua'i ma se alofa ia Keriso. E tatau ona ia lapataiaina ekalesia i le matautia o le tulaga ua oo iai, ae maise lona faailoa atu ia i latou le natura moni o Roma.

Faaopopo atu i lea, le fesligia o le aia faaperofeta a Ioane e isi foi perofeta. Na ia lapataia ekalesia ia le faaseseina i latou e perofeta pepelo pei o Iesepela.

Na faafuase'i ona tuuina ifo ia Ioane le faaaliga a o tapuai o Ia i Le Atua. Na ia faalogoina le leo o le Keriso toetu mai. O le vaaiga i le Faaaliga 1:12–18, na maua ai e Ioane le malamalama, le faamoemoe, ma le faamalosi.

O loo la'ei mai Keriso faa Faitaulaga Sili i le malumalu i le lagi. O nei ata faatusa mai le Feagaiga Tuai e faamanatu mai ai ia i tatou Ieova—o le suafa e tele ina faaaogaina mo Le Atua, na matua maofa tele ai Ioane. Ae pa'i mai loa le aao o Iesu i lona tau'au ma faapea mai, “*Aua e te fefe.*”

O loo ia Iesu le feau mo Ona tagata. Ona fai atu ai lea o Ia ia Ioane ia tusia i lalo mea uma ma auina atu ia i latou. Ua na o tusi nei tatou te maua ai le finagalo malamalama o Iesu e faatatau i Lana ekalesia.

E iai i feau nei e fitu olega e faailoa mai ai le faanaunauga o Iesu i Lana ekalesia. E tofu le ekalesia ma le sootaga faapitoa atu ia Iesu. Na Te mafai foi ona fesootai mai i le tulaga o iai ekalesia taitasi e tusa ai ma lo latou manaomia o Ia. E le gata i lea, e tofu lava le ekalesia ma lana galuega e ese mai ai i le isi. Ma e mafai lava e Iesu ona fesootai atu ia i latou e pei lava ona Ia fesootai mai ia i tatou i le aso.

O faaaliga la, o lu'iga i ekalesia ia faia mea o loo ole mai ai Iesu. E aofia i nei faaaliga o le potu o le nofoalii i le lagi, o tietie solofanua e fa, mala, iliga pu, Amaketo, o le lepa afi, ma le Ierusalema Fou. O nei ata uma na fuafuaina e fafagu ai tagata o Le Atua ma afua ai se toe fuata'iga.

O se tasi o tulaga faamamafaina i nei tusi e 7, o le a le sootagata a le Kerisiano ma lona siosiomaga? O le fesili e lulu'i mai pea ia i tatou e oo mai lava i le aso. E taua tele lenei fesili pe afai e iai ni tu ma aga eleelea a se siosiomaga.

A o tusia le Tusi o Faaaliga, e foliga mai o loo iai Roma i se tulaga agalelei tele. Na tuuina atu e Roma i ekalesia le filemu, tamaoiga ma le saogalemu. Sa faatamaoigaina foi nisi o Kerisiano ma manatu ai e leai se mea latou te toe manaomia. Peitai o lea tamaoiga e noatia atu ai i latou ia Roma, ma o le mafuaaga lea na taumafai ai Ioane e faamalamalamaina ia i latou le natura moni o Roma.

Ina ia amanaia e le nuu e tatau ai ona latou auai i tu ma aga ma mea fai uma. E tatau ona auai i fefaatauaiga, fesootai ma tagata uma ma auai i faigaai e aai ai i mea ai na osia ai tualaga i atua o tagata faapaupau. Sa taulamua foi Asia Ititi i tapuaiga i taitai o malo, o le malosiaga lea e fusia faatasi ai le itumalo ma nuu. A o le malumalu sa totonugalemu iai nei faiga uma.

O se tasi e le auai i nei faiga, e faate'aina pe sili atu foi le leaga o le tulaga e oo iai, e le toe ta'ua o se tagataanu. E tele ina faaiuina nei faigaai e fai i le malumalu i onaga ma faitaaga.

Sa iai nisi i le ekalesia e manatu e fetuutuunai ina ia auai i nei faiga uma. Sa vaaia le faa Kerisiano o se tasi o vaega o le faa Iutaia ma le manaomia ai ona auai i nei faiga i le malumalu. Peitai, talu mai le faatafunaga o Ierusalema, na le toe taliaina ai Kerisiano i sumnako. Afai la e le o toe vaaia Kerisiano o se vaega o tagata Iutaia, ona tatau lea ona aofia ai ma Kerisiano i tapuaiga i taitai o le malo.

Ona fesagai ai lea o nei ekalesia ma faafitauli maoa'e lava mai fafo.

Ae sa tele foi faafitauli i totonu o nei ekalesia. O le tele lava o taimi, o ni ekalesia fevaevaeai. E tusa ai ma le silafia e Iesu, e lima o ekalesia o lenei e fitu, e tatau ona toe fuata'iina—ae le'i atoa se ta'i 50 tausaga talu ona amataina.

O tusi nei, e na o lea pau ia o faamaumauga manino i foliga o le ekalesia i le uluai 20 tausaga talu ona mavae le Penetekoso. O se ata moni lava lenei ona e afua mai ia Iesu lava Ia.

O nei tusi, na tusia faapitua lava mo ekalesia ma'oti ia e fit. Peitai e aoga mo Kerisiano uma lava foi i le talaaga o le Ekalesia Kerisiano atoa—e le gata mo aulotu, ae mo tagata ekalesia foi taitoatasi. E pei lava ona ta'ua mai i tusi uma, “o *le* ua iai taliga ina faalogo ia,” e tatau lava ona amanaia. O le lotu, o le nofoaga lea tatou te omai e faalogo ai i mea e fetalai mai ai Iesu.

E iai taimi tatou manatu ai i ekalesia e pei ni fale (model houses) e matamata ai tagata o fia faatau ni o latou fale—e tumau lo latou mama ma le faatulagaina lelei o mea uma. Peitai, o ia ituaiga fale e le nonofo ai nisi. O le taimi lava e nofoia ai le fale, gaogaosa loa foi. E valaauina loa e Iesu tagata i totonu o Lana ekalesia, ona faatumulia foi lea o Lana ekalesia i le gaogaosa.

Silasila i soo se vaitaimi lava o le talaaga o le ekalesia e te maua ai ekalesia e pei lava o ekalesia e fitu. E moni, o loo iai le ma'i papala i nei ekalesia: o le toatele o tagata o le uluai ekalesia na faamaoni lava; a o ekalesia na mulimuli atu ai, o le toatele o tagata ekalesia na o ese mai aoga Kerisiano. A o le taimi lava e tasi, vaai foi i le agaigaiga o folafolaga—e foliga mai, “*peitai ua silisili lava le alofa tunoa, ina o faateleina le agasala*” (Roma 5:20).

### Aisea e tele ina oo mai ai faafitauli i le ekalesia?

O faafitauli i totonu e tele lava ina oo mai pe a lafoaia e le ekalesia le tala lelei. E lua tulaga e oo iai: 1) pa'u atu ai lea i salu tulafono (**legalism**: *strict adherence to a literal interpretation of law, rule, or religious moral code—o le tautu e tasi lava le faamalamalamaina faatino [literal] o le tulafono, se poloaiga, pe o uiga tatau ai*). 2) pe o le matua lafoaia o le tulafono (**antinomianism**: *the belief that Christians are not bound by established moral laws, but should rely on faith and divine grace for salvation—o le talitonuga lea e saisaitia le Kerisiano i tulafono o uiga e tatau ai, a e faalagolago i le faatuatua ma le alofa tunoa mo le faaolataga [italics supplied]*). O le salutulafono (legalism), o le manatu lea e faigofie lava ona e lelei ma Le Atua e ala i lou ola amio lelei. O le lafoai o le tulafono (antinomianism), o le manatu lea e mafai lava ona e lelei ma Le Atua ae

faia lava le ituaiga olaga e te manatu lava oe iai. O le tulaga e manaomia, o le **tala lelei paleni lea.**

O le tala a Matini Luteru e faatatau i le ‘ona e ono malamalama ai lenei tulaga. E fesili Matini i tagata, “Tou te iloa le mea e oo i le ‘ona pe a tuuina i luga o le solofanua? E tasi le mea mautinoa e pa’u i lalo le ‘ona mai le solofanua! O le mea e te le mautinoa, pe pa’u le ‘ona i le itu taumatau, pe o le itu tauagavale!” Na manatu Luteru, e pei Kerisiano o le ‘ona ma lana solofanua. O le faigata ia ona tatou tausia le paleni i le va o le tala lelei maua fua i le taliaina i le tasi itu, ma le tausia o tulafono i le isi itu. Sa manatu Luteru, o taimi uma lava na te folafolaina ai le tulafono, o taimi uma foi ia e galo ai i tagata le usitai. A o taimi uma foi na te laugaina ai le usitai, o taimi foi ia e galo ai i tagata le tala lelei.

A tatou malamalama loa, e le mafai lava ona tatou ausia se lelei tatou te ta’uta’u atu i Le Atua, o lona uiga e tatau ona tatou omai ia Iesu ma talitonu e na o Lona soifua lava, ua foaiina mai ia i tatou o se mea alofa, ona tatou tuuina atu lea ia te Ia o tatou loto ma tatou naunau ai e usitai ia te Ia e mafua i le agaga faafetai. O le a iai loa le mafutaga alofa. O Le Atua, o la tatou uo aupito sili lava lea. O le fatu atoa lenei o le olaga Kerisiano.

O le mafuaaga lea ua tatou te manaomia ai o ne faaaliga fou o le Keriso toetu mai. E mafai ona tatou toe foi mai ia Iesu Keriso. E mafai ona toe fuatai o tatou olaga.

E faamasinoina ekalesia nei e fitu i lo latou mafai ona faamalalamaina Iesu Keriso i le lalolagi pogisa. E susulu atu tuugalamepa taitai i tagata taitoatasi. Tatou te susulu au le ituaiga tagata e iai o tatou tagata.

I totonu o nei tusi, tatou te maua ai se vaaiga moni lava o le ekalesia a o ea a’e mai augatupulaga o le au aposetolo. O le mafuaaga lea o leaga uma e mulimuli atu i le isi 2000 tausaga. O le a sili ona faatuputeleina nei fatu leaga.

O nei feau uma o loo tuuina mai i le malamalamaaga o puapuaga tele e oo mai e Tuaoi tonu ma le afio mai o iesu i le lalolagi. E faapitoa lava le aoga o nei tusi mo i tatou.

O le tulai ola mai lenei tusi o Faaaliga ina ua tatou fesagai ma faigata. E le mo ni tagata faifai malie lenei tusi. O le tele o le lagona o le Kerisiano e inosia o ia

e le lalolagi, a o le faateleina foi lena o le mana o lenei tusi. O le a matua susulu a latou lamepa e pei o fetu o le lagi i le lalolagi pogisa ma le maalili.

E ui e faatumulia i leaga ma aleu, o le ekalesia lava a Iesu Keriso. O le tulaga e iai pea Keriso i le lotolotoi o Lana ekalesia, o le feau lea o le Faaaliga 1–3. E alofa tele o Ia i Lana ekalesia ma Ia faamalo mai iai i taimi e mafai ai. E iai taimi Na Te silafia ai ua tatau ona otegia Lana ekalesia, o Na Ia faia lea. Ae tumau lava foi ma Lona tuuina atu iai o se folafolaga o le faamoemoe mo le lumanai.



© All rights reserved Seventh-day Adventist Church South Pacific Division. Not for profit publication. Faatagaina le faaliliuina e Etuati E. Erika [erika@adventist.org.au](mailto:erika@adventist.org.au) <http://carrumdowns.adventist.org> [www.revelationhope.com](http://www.revelationhope.com)